

Na osnovu člana 19. stav 1. Zakona o Vladi Federacije Bosne i Hercegovine ("Službene novine Federacije BiH", broj 1/94, 8/95, 58/02, 19/03, 2/06 i 8/06), a u vezi sa čl. 4. i 13. Zakona o sistemu državne pomoći u Bosni i Hercegovini ("Službeni glasnik BiH", broj 10/12), Vlada Federacije Bosne i Hercegovine, na 52. sjednici održanoj 30.05.2012. godine, donosi

UREDBU O NAČINU VOĐENJA I METODOLOGIJI POPISA PROGRAMA DRŽAVNE POMOĆI U FEDERACIJI BOSNE I HERCEGOVINE

Član 1.

Ovom uredbom utvrđuje se sadržaj dokumenta Popis programa državne pomoći i metodologija izrade Popisa programa državne pomoći.

Član 2.

- (1) Davaoci državne pomoći, u smislu ove uredbe su budžetski korisnici: federalni, kantonalni, gradski, općinski i drugi organi nadležni za ovu vrstu pomoći.
- (2) Popis programa državne pomoći (u daljem tekstu: Popis) je dokument koji predstavlja sveobuhvatan skup podataka svih programa pomoći koji su pokrenuti ili realizovani u prethodnoj i tekućoj budžetskoj godini.
- (3) Program državne pomoći predstavlja akt (uredba, pravilnik ili drugi akt) na osnovu kojeg se neodređenom broju korisnika dodjeljuje pojedinačna državna pomoć.

Član 3.

- (1) Popis programa državne pomoći vodi se u pisanoj i elektronskoj formi i sadrži sljedeće podatke:
 1. naziv mjere državne pomoći;
 2. naziv pravnog propisa (zakon, podzakonski akt, odluka);
 3. naziv davaoca državne pomoći;
 4. naziv organa za provođenje državne pomoći;
 5. naziv primaoca državne pomoći;
 6. sektor djelatnosti primaoca državne pomoći;
 7. oblik državne pomoći;
 8. vrsta državne pomoći (program, pojedinačna);
 9. datum stupanja na snagu programa državne pomoći;
 10. vrijeme trajanja državne pomoći;
 11. neto iznos državne pomoći;
 12. indirektan ili direktan transfer sredstava,
 13. postojanje ekonomske prednosti, dovodenje u povoljniji položaj primaoca državne pomoći;
 14. postojanje selektivnih kriterija i
 15. da li državna pomoć narušava ili prijeti narušavanju konkurencije davanjem prednosti određenim subjektima ili određenim proizvodima.
- (2) Popis se provodi popunjavanjem propisanih obrazaca od davaoca državne pomoći i dostavljanjem Federalnom ministarstvu finansija (u daljem tekstu: Ministarstvo).

Član 4.

- (1) Davalac državne pomoći dužan je propisane podatke za izradu Popisa dostaviti Ministarstvu posebno za prethodnu, a posebno za tekuću godinu, u pisanom i elektronskom obliku, u formi Tabele za Popis (Prilog I), koja se sa Uputstvom za popunjavanje nalazi u prilogu ove uredbe i koja čini njen sastavni dio.
- (2) Izuzetno od stava 1. ovog člana, ministarstvo nadležno za poslove poljoprivrede dostavlja samo podatke o ukupno dodijeljenim iznosima državne pomoći za poljoprivredu.

Član 5.

Za potrebe izrade Popisa, državna pomoć se razvrstava, zavisno od cilja i iznosa dodijeljene državne pomoći, prema sljedećim oblicima pomoći:

- a) državna pomoć dostupna cijeloj privredi predstavlja državnu pomoć:
 - 1) za male i srednje privredne subjekte,
 - 2) za sanaciju i za restrukturiranje privrednog subjekta u teškoćama,
 - 3) za zapošljavanje,
 - 4) za zaštitu životne sredine,
 - 5) za istraživanje, razvoj i inovacije,
 - 6) za stručno usavršavanje,
 - 7) u obliku rizičnog kapitala,
 - 8) u oblasti kulture i zaštite kulturne baštine,
 - 9) ostale horizontalne državne pomoći,
- b) državna pomoć dostupna određenim sektorima predstavlja državnu pomoć:
 - 1) u sektoru proizvodnje čelika,
 - 2) u sektoru vađenja uglja,
 - 3) u sektoru saobraćaja:
 - cestovni saobraćaj
 - željeznički saobraćaj
 - zračni saobraćaj,
 - 4) u sektoru turizma,
 - 5) u sektoru poštanskih usluga,
 - 6) u oblasti javnih medija,
 - 7) u oblasti zdravstvene zaštite,
 - 8) u sektoru šumarstva i
 - 9) u ostalim sektorima,
- c) državna pomoć male vrijednosti (de minimis državna pomoć) i
- d) državna pomoć u oblasti poljoprivrede.

Član 6.

Vrste državne pomoći, odnosno instrumenti putem kojih se pomoć iz člana 5. ove uredbe dodjeljuje, su:

- a. subvencije/podsticaji;
- b. nepovratna pomoć, grantovi;
- c. umanjenja ili izuzeća od primjene finansijskih obaveza;
- d. porezne olakšice;
- e. otpisivanje dugovanja ili preuzimanje dugovanja;
- f. dodjeljivanje zajmova sa preferencijalnim kamatnim stopama i
- g. druge vrste dodjele državne pomoći.

Član 7.

Općine su dužne izvršiti popis programa državne pomoći pokrenutih prije osnivanja Vijeća za državnu pomoć Bosne i Hercegovine te isti dostaviti u pisanoj i elektronskoj formi kantonalnom ministarstvu finansija do 15.06.2012. godine.

Član 8.

Kantonalna ministarstva finansija dužna su izvršiti popis programa državne pomoći za kanton, pokrenutih prije osnivanja Vijeća za državnu pomoć Bosne i Hercegovine, konsolidovati općinske popise te ih u pisanoj i elektronskoj formi dostaviti Ministarstvu do 20.06.2012. godine.

Član 9.

Ministarstvo je dužno izvršiti popis državne pomoći za sve federalne organe uprave i konsolidovati popise državne pomoći za kantone i općine.

Član 10.

Ministarstvo je dužno informisati Vladu Federacije Bosne i Hercegovine o Popisu, a zatim Popis dostaviti Vijeću za državnu pomoć radi izrade sveobuhvatnog popisa za Bosnu i Hercegovinu.

Član 11.

Ova uredba stupa na snagu narednog dana od dana objavljivanja u "Službenim novinama Federacije BiH".

V. broj 850/2012
30. maja 2012. godine
Sarajevo

Premijer
Nermin Nikšić, s. r.